

四庫全書

史部

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷二十六

厚風俗

雍正元年癸卯二月癸亥

上諭禮部致治之要首在風化移風易俗莫先於鼓勵良
善使人人知彝倫天則之為重忠孝廉節之宜敦古帝
王勞來匡直所以納民於軌物者舍是無由也朝廷每

遇覃恩詔款內必有旌表孝義貞節之條實係鉅典邇來直省大吏往往視為具文並未廣咨遠訪祇憑郡縣監司申詳即為題請建坊而山邨僻壤貧寒耕織之人或菽水養親天性篤孝或栢舟矢志之死靡他鄉鄰嗟歎為可欽而姓氏不傳於城邑幽光湮鬱潛德銷沉者何可勝數爾部即行傳諭督撫學政嗣後務令各屬加意搜羅虛公核詢確具本人鄉評實蹟題請旌獎勿以匹夫匹婦而輕為沮抑勿以富家巨族而濫為表揚以

副朕成俗化民實心彰善至意

八月己酉

上諭各省鹽政官員國家欲安黎庶莫先於厚風俗厚風俗莫要於崇節儉周禮一書上下有等財用有度所以防僭越禁驕奢也孟子亦曰食時用禮菽粟足而民無不仁朕臨御以來躬行節儉欲使海內之民皆敦本尚實庶康阜登而風俗醇厚夫節儉之風貴行於閭里而奢靡之習莫甚於商人朕聞各省鹽商內實空虛而外事

奢侈衣服屋宇窮極華靡飲食器具備求工巧俳優妓
樂恒舞酣歌宴會嬉遊殆無虛日金錢珠貝視為泥沙
甚至悍僕豪奴服食起居同於仕宦越禮犯分罔知自
檢驕奢淫佚相習成風各處鹽商皆然而淮揚為尤甚
使愚民尤而效之其弊可勝言哉爾等既司鹽政宜約
束商人嚴行禁止出示曉諭諄切勸誡使其痛自改悔
庶循理安分不至蹈僭越之愆而省一日之糜費即可
以裕數日之國課且使小民皆知警惕敦尚儉約於民

生亦有裨益庶不負朕維風振俗之意若仍前奢侈不知悛改或經朕訪聞或被督撫叅劾商人必從重究治爾等亦不能辭徇縱之咎

九月乙巳

上諭大學士等人臣膺命効職果能實心愛民清白自矢則官去民思甘棠畱詠有愈久而不能忘者從古有之若今之生祠書院不知始自何人自督撫提鎮以及監司守令所在多有究其實不過該員在任之時或係屬

員獻媚或係地方紳士逢迎甚至有出入公門包攬詞訟之輩倡議糾合假公派費占地興工以致園囿亭臺窮極華麗勞民傷財一無顧惜營造之後或為宴會遊玩之場或本官竟據為產業果係官去民思不忘遺愛特為興建者甚少此事向曾禁止而踵弊如故應加嚴飭嗣後如有仍造生祠書院或經告發或被糾叅即將本官及為首之人嚴加議處其現在之生祠書院如實係名宦去任之後百姓追思蓋造者准其存畱其餘俱

著地方官查明一槩改為別用或為義學延師授徒以廣文教如此則以無用為有用惜民財力杜絕虛浮於地方風俗大有裨益

雍正二年甲辰四月戊申

上諭八旗官員等朕以八旗滿洲等生計時僅於懷其縱肆奢靡歌場戲館飲酒賭博等事屢經降旨訓誡即諸臣條奏所請應行禁止之處亦已施行凡朕所降諭旨及各項禁約務將歷年利弊詳加剖晰明白書寫每旗

每佐領各頒一張嚴示衆人各都統亦宜時加訓誡謂
主上廩念八旗滿洲等生計種種恩施不一而足各宜
安分遵守儉樸之道力改奢靡凡賭博縱飲遨遊園館
等事洗滌惡習以副主上訓諭仁愛至意儻不實心感
戴不學為善不遵法度則一生徒自暴棄不但終身卑
賤且無益於生計雖主上疊布恩施何益之有主上頻
勞心慮諄諄訓飭爾等誠宜省悟日夜仰戴遵行儉樸
之道凡清語騎射當差行走操演技藝嫺習禮儀等事

皆當盡心努力學之或有不改前愆不遵法度之人一經查出務必從重治罪以警衆人併將此語書寫不時傳示始為有益不然但於朕降旨時暫申禁令久而遂輟亦何益哉將此傳諭八旗都統知之

雍正三年乙巳三月乙卯

上諭九卿等節行為風化之首故旌揚盛典厯代崇之朕即位以來拳拳以敦教化勵風俗為務恩詔中敕令旌表節義嗣又頒發諭旨至再至三誠欲地方有司加意

採訪每見直省舉報節行俱係民間婦女而營伍中人絕少豈旌典例由生員具呈教官具結與兵丁聲氣渺不相通無由舉報耶嗣後必使兵民一體凡營伍中節行貞烈之婦女盡得舉報不致冒濫亦不致隱漏以副朕廣勵風節至意

四月庚辰

上諭盛京將軍等邇來盛京諸事隳廢風俗日流日下朕前祭

陵時見盛京城內酒肆幾及千家平素但以演戲飲酒為事稍有能幹者俱於人參內謀利官員等亦不以公務為事衙門內行走者甚少其聚會往來不過彼此相請食祭肉嬉戲而已司官竟有終年不一至衙門者堂官亦置若罔聞坐臺之人看守邊口俱係關東人伊等雖有押送罪人之差而當兵者全無當兵之實為官者亦無為官之道朕深知此等陋習雖降諭旨數次竟不悛改因將將軍大臣內不及者革退另簡爾等補授爾等

雖係新任但能畱心細訪即便知之應將盛京陋習極力整飭令其峻改復還滿洲舊日儉樸風俗勤學騎射武藝若有惡亂之人即加重處以儆其餘將軍大臣其欽遵朕旨與下屬官員同心協力各自黽勉力改從前陋習再盛京地方乃本朝創業之地關係甚重爾等將聚集惡亂之人不時稽查應逐去者作速逐出境外大臣等若仍相推諉不實心効力朕訪聞治罪之時勿復怨悔

雍正四年丙午十月己巳

上諭大學士九卿等直隸地方旗民雜處往往以強陵弱
勢力相加而謹樸良民常被欺壓因而相習於強悍之
風不知悛改俗不淳厚或由於此朕勵精圖治欲四海
之廣道德一而風俗同況輦轂之下首善之區尤當整
飭化導以為萬邦之式今欲將滿漢漢軍御史各差二
員令其巡查直隸八府地方凡旗下告退官員及在屯
之莊頭內監之族戚與在籍之鄉紳衿監儻有不安本

分陵虐良民不畏官吏恣行暴悍者或即行懲治或具本叅奏其地方命盜案件亦聽其查訪務使豪強斂跡良善安居以副朕移風易俗之至意其如何遣官分巡之處爾等定議具奏

辛未

上諭戶部朕覽所奏恩詔內賞給老人一項直隸各省七十以上至百歲以上老民老婦共一百四十二萬一千六百二十五名其仕宦紳士商賈僧道皆不入此數內

洪範以壽居五福之首而昔人稱七十為古稀誠以壽為難得而可貴也乃今日老人之多至於如此皆由我皇考聖祖仁皇帝六十餘年以來深仁厚澤休養生息凡山陬海澨僻壤窮鄉無不沐浴

鴻慈涵濡大化和翔洽壽國壽民所以期頤耄耋龐眉皓首之人至數百餘萬之多所謂老者以壽終幼孤得遂長者皆我

皇考之賜也從此益加培養日積月累則民間之享高年

介眉壽者更不知如何之衆矣此等老人躬際昌期年
登上壽大抵皆居心忠厚力行善事之人即或有一二
年少時未盡醇謹者亦必中年暮齒能自悔悟益一念
修省即荷

上天福祐也是國家有培養之恩而本人又能修善以祇
承之非倖而致之者也爾等百姓覩太平之盛事當歡
欣鼓舞謹身修德以迓

天庥父與父言慈子與子言孝兄弟友恭夫婦和順比閭

族黨之間相親相愛無詐無欺革薄從忠循分守法盡除乖戾之氣為國家淳樸善良之民則

天地佑善錫福長享遐年此必然之理也但生齒日盛食指繁多則謀生之計不可不講爾等百姓當重農桑以順天時勤開墾以盡地利務本業以戒游惰謹蓋藏以裕久遠而且節省食用愛惜物力毋尚奢侈毋競紛華毋任意糜費以耗有用之財毋但顧目前而忘經久之計朕以勤儉先天下宮禁之中尚多方撙節愛養以為

金史卷二十六
加惠元元之本爾等小民安可忘物力之艱難乎誠能
體朕諄諄訓諭之意敦善行則心體安務本計則俯仰
足惜財用則家室裕人心和樂風俗醇美同為壽考之
人長享昇平之福朕益有厚望焉

十一月癸丑

上諭內閣滿洲風俗尊卑上下秩然整肅最嚴主僕之分
家主所以約束奴僕者雖或嚴切亦無不相安為固然
及至見漢人陵替之俗彼此相形而不肖奴僕遂生缺

望雖約束之道無加於疇昔而向之相安者遂覺為難
堪矣乃至一二滿洲大臣漸染漢人之俗亦有寬縱其
下漸就陵替者此於風俗人心大有關係不可不加整
飭夫主僕之分一定則終身不能更易在本身及妻子
仰其衣食賴其生養固宜有不忍背負之心而且世世
子孫長遠服役亦當有不敢縱肆之念今漢人之奴僕
乃有傲慢頑梗不遵約束加以訶責則輕去其主種種
敝俗朕所洞悉嗣後漢人奴僕如有頑傲不遵約束或

背主逃匿或私行訛謗被伊主覺察者應作何懲治與
滿洲待奴僕之法作何畫一之處著滿洲大學士九卿
詳悉定議具奏

雍正五年丁未正月癸巳

上諭八旗官員兵丁等滿洲風俗原以淳樸儉約為尚今
漸染漢人習俗互相倣倣以致諸凡用度皆涉侈靡不
識撙節之道因酌定品次以禁服色勒限一年令其各
按品次著用諭旨甚明此特軫念八旗滿洲官兵如同

保赤關係尤切故曲為籌畫或有無知之徒於已禁之後新製衣服誑稱禁前所製若如此則終無底止時矣人之尊榮不在衣服惟在各人行止蓋富足之人少而貧乏之人多既已貧乏而強相倣倣則生計愈窘爾等與其為衣服拮据倣倣豈若安守本分砥礪於技藝品行如果能奮勉得至官員大僚即可服用矣凡官員兵丁所恃以謀生者惟在俸餉且各有應當之差若因製一衣服即耗費數月之錢糧其日用尚能饒裕乎夫儉

約為持家根本不能節省於衣服等項焉能有益於生理若能謹遵朕諭儉約自持不事奢靡濫用馴至比戶充盈方感戴朕教養之深恩也著交與八旗該管處再行曉諭務使咸知朕心各圖儉約以副朕軫恤優待旗人之至意

四月己亥

上諭管理旗務諸王及滿洲文武大臣等自古人生以節儉為本益節儉則不至於困窮糜費則必至於凍餒此

理所必然者也本朝滿洲素性淳樸凡遇出兵行圍俱係自備並無違誤而生計各足近來滿洲等不善謀生惟恃錢糧度日不知節儉妄事奢靡朕屢曾降旨諄諄訓諭但兵丁等相染成風仍未改其糜費之習多有以口腹之故而鬻賣房產者即如每飯必欲食肉將一月所得錢糧不過食肉數次即罄盡矣又將每季米石不思存貯備用違背禁令以賤價盡行糶賣沽酒市肉恣用無餘以致闔家匱乏凍餒交迫尚自誇張謂我從前

曾食美物服鮮衣並不悔悟所以致此困窮者乃以美食鮮衣之故也今漢人謀生尚知節儉殷實之家每日肉食者甚少其貧乏之人孳孳謀食僅堪餬口若滿洲等果能節儉將每月所得錢糧少使畱餘則日久習成生計自裕產業可立矣或有不肖之輩不守本分妄行糜費既至貧乏惟希恩賞從前

皇考軫念兵丁効力行間致有債負曾發帑金五百四十萬五千餘兩一家獲賞俱至數百如此厚賚未聞兵

丁等置有產業生計滋益者悉由妄用於衣食徒令貿易之人得利一二年間蕩然無餘心愈奢侈而生計較前反加窘乏其後又發帑金六百五十五萬四千餘兩賞賜兵丁人等亦如從前立時費盡朕自即位以來除特行賞賜外賞給兵丁一月錢糧者數次每次所賞需銀三十五六萬兩此銀一入兵丁之手亦不過妄用於飲食不及十日悉為烏有亦何裨益且庫帑俱係國家之正項天下百姓之脂膏豈可無故濫行賞賚以累百

萬之帑項徒供伊等數日口腹之費乎若不將惡習改除朕即有施恩之意亦不可舉行兵丁等果將朕訓諭之意曉然明晰實心遵行痛改妄行糜費之習朕加恩賞賜衆亦可得永遠均霑至生計各遂之時始知朕所以愛養滿洲之恩為至深且切也王大臣等亦宜各從儉約以為下人之表率行之既久自可挽此惡習滿洲乃國家根本朕知之既深豈有不教之理朕自即位以來衆人有論朕為太嚴者斯亦由朕欲衆人痛改惡習

進於善良止其奢靡使知儉約凡朕意慮所及之處悉申禁令而不肖匪類不得肆行其意或妄加議論如朕曾有禁止酤酒禁止賭博赴園館鬪雞及鷓鴣蟋蟀僱人當差放印子銀兩典錢糧米石用黃銅器皿等諭旨悉為兵丁等身家計也如此訓誨不已衆人咸應體朕苦衷且此等訓誡咸係

皇考從前禁止之事並非創始於朕但當時之臣工未能實心奉行是以一應惡習未得盡改今王大臣官員內

仰體朕旨加意奉行者不過十居其五大半未愜朕懷而無知之人遂論以為過嚴如欲使若輩稱為寬仁之主何難之有但不加約束任其種種糜費則不但坐視滿洲等漸流至於不得衣食毫無顏面即以國家全力養贍伊等亦且不能給足朕意實有所不忍勢亦必不可也爾等其仰副朕意各將所屬官兵及閒散人等剖析情理不時詳加訓誡

五月己未

上諭內閣前織造等衙門貢獻物件所進御用繡線黃龍袍曾至九件之多又燈幃之上有加以綵繡為飾者朕心深為不悅即降旨誠諭近因端陽令節外間所進香囊宮扇中有裝飾華麗雕刻精工者此皆開風俗奢侈之端朕所深惡而不取也向來外省諸臣凡有進獻方物朕每頒賜諸王內外大臣如黃龍繡緞之類既不可以頒賜不過收貯於宮中耳其餘華燦之物在朕用之心中尚覺不安若賜諸王大臣在伊等亦覺非分豈非

費於無益之地乎況朕素性實不喜華靡一切器具惟以雅潔適用為貴此朕撙節愛惜之心本出自然並非勉強數十年如一日者凡外臣進獻惟應量加工價少異於市肆之物即可見恭敬之忱何必過於工巧人情喜新好異無所底止見一美麗式樣初則競相慕倣後必出奇鬪勝此雕文纂組古人所以斥為奇衰豈可導使為之而不防其漸乎蓋治天下之道莫要於厚風俗而厚風俗之道必當崇儉而去奢若諸臣以奢為尚又

何以訓民儉乎朕觀四民之業士之外農為最貴凡士工商賈皆賴食於農以故農為天下之本務而工賈皆其末也今若於器用服玩爭尚華巧必將多用工匠市肆中多一工作之人則田畝中少一耕稼之人且愚民見工匠之利多於力田必羣趨而為工羣趨為工則物之製造者必多物多則售賣不易必至壅滯而價賤是逐末之人多不但有害於農而並有害於工也小民舍輕利而趨重利故逐末易而務本難苟遽然繩之以法

必非其情之所願而勢有所難行惟在平日留心勸導使民知本業之為貴崇尚樸實不為華巧如此日積月累遂成風俗雖不必使為工者盡歸於農然可免為農者相率而趨於工矣至於士人所業在乎讀書明理以為世用故居四民之首然父兄之教子弟亦當觀其才質如何若果穎悟醇謹可望有成則當使之就學而為士若愚濁中下之資讀書難通即當早令改業使盡力於南畝誠恐讀書不成而又麤識數字曠廢閒遊必致

非分妄為越禮犯法是浮慕讀書之名而不得其道其
傷農而害本者為尤甚也朕深揆人情物理之源知奢
儉一端關係民生風俗者至大故欲中外臣民黜奢賤
末專力於本人人自厚其生自正其德則天下共享太
平之樂矣朕自身體力行為天下先諸王內外大臣文
武官弁與鄉紳富戶當深體朕心欽遵朕諭期共勉之

十一月庚辰

上諭內閣向來常有演習拳棒之人自號教師召誘徒衆

鼓惑愚民此等多係游手好閒不務本業之流而强悍少年從之學習廢弛營生之道羣居終日尚氣角勝以致賭博酗酒打降之類往往由此而起甚且有以行教為名勾引劫盜竊賊擾累地方者若言民間學習拳棒可以防身禦侮不知人果謹遵國法為善良尚廉耻則盜賊之風盡息而鬪訟之累自消又何須拳棒以防身乎若使實有膂力勇健過人何不學習弓馬或就武科考試或投營伍食糧為國家効力以圖榮身上進豈可

私行教習誘惑小民耶著各省督撫轉飭地方官將拳棒一事嚴行禁止如有仍前自號教師及投師學習者即行拏究庶游手浮蕩之徒知所做懼好勇鬪狠之習不致漸染而民俗可歸於謹厚矣

雍正七年己酉三月戊申

上諭內閣直省各處富戶其為士民而殷實者或由於祖父之積累或由於己身之經營操持儉約然後能致此饒裕此乃國家之良民也其為鄉紳而有餘者非由於

先世之遺畱即由於己身之俸祿制節謹度始能成其
家計此乃國家之良吏也是以紳衿士庶中家道之殷
實者實為國家之所愛養保護則本身安可不思孳孳
為善以永保其身家乎夫保家之道奢侈糜費固非所
以善守而慳吝刻薄亦非所以自全周禮以鄉三物教
萬民有曰孝友睦婣任卹可知公財行惠任卹之義與
孝友而並重也蓋凡窮乏之人既游閒破耗自困其生
又不知已過轉懷忌於溫飽之家若富戶復以慳吝刻

薄為心腹削侵牟與小民爭利在年穀順成之時固可
相安一遇歉荒貧民肆行搶奪先衆人而受其害者皆
為富不仁之家也逮富家被害之後官法究擬必將搶
奪之窮民置之重典是富戶以歛財而傾其家貧民以
貪利而喪其命豈非兩失之道大可憫惻者乎朕為此
勸導各富戶等平時當以體恤貧民為念凡鄰里佃戶
中之貧乏者或遇年穀歉收或值青黃不接皆宜平情
通融切勿坐視其困苦而不為之援手如此則居常能

緩急相周有事可守望相助攷求之念既忘親睦之心
必篤豈非富戶保家之善道乎從來家國一理若富戶
能自保其身家貧民知共衛夫富戶一鄉如此則一鄉
永靖一邑如此則一邑長寧是富戶之自保其家猶富
戶之宣力於國也況積善之家必有餘慶種福果於天
地之間子孫必長享豐厚豈不美歟著各省督撫將朕
此旨通行該屬之鄉紳士民人等共知之

六月丁丑

上諭內閣游惰之民自昔治天下者所深惡若賭博之人
又不止於游惰而已荒棄本業蕩廢家貲品行日即於
卑汚心術日趨於貪詐父習之則無以訓其子主習之
則無以制其奴鬪毆由此而生爭訟由此而起盜賊由
此而多匪類由此而聚其為人心風俗之害誠不可以
悉數也凡為不善之事者雖干犯功令猶可得微利於
一時獨至賭博則今日之所得明日即未必能保若合
一年數月而計之勝者與負者同歸於盡此人所共知

者無如邪僻之人一入其中迷而不悟數年以來屢次降旨嚴禁而此風尚未止息者以尚有製造賭具之人而有司之禁約未盡力也百工技藝之事可以獲利營生者何事不可為而乃違禁犯法製此壞風俗惑人心之具其罪尚可言乎嘗思賭博之風所以盛行者父兄為之子弟在旁見而倣之家主為之奴僕在旁見而倣之甚至婦人女子亦沉溺其中而不以為怪總因習此者多故從風而靡者衆也假若嚴行禁止使人不敢再

犯則日積月累此風自然止息無俟條教號令之煩也
凡地方大吏有司均有化民成俗之責而乃悠悠忽忽
視為泛常安辭溺職之咎今特定本地官員勸懲之法
以清其源嗣後拏獲賭博之人必窮究賭具之所由來
其製造賭具之家果審明確有證據出於某縣將該縣
知縣照溺職例革職知府革職畱任督撫司道等官各
降一級畱任如本地有私造賭具之家而該縣能緝拏
懲治者知縣著加二級知府著加一級督撫司道等官

著紀錄二次將此勸懲之法永著為例於雍正庚戌年
為始著該督撫通行曉諭使城邑鄉邨及遠陬僻壤咸
各聞知

雍正八年庚戌正月壬午

上諭內閣從來左道妖言如讖緯圖記禳祥禍福之屬皆
足以惑世誣民為人心風俗之大患自古帝王皆深惡
而嚴禁之苟有犯者必置重典雖赦宥所以為世道
民風計者至深遠也朕觀陝西之人秉性直魯凡好為

誕妄之說者多至此省搖惑人心年來屢有其事已降
旨切加訓誡矣觀滿洲漢軍人等亦每易為此等邪說
所惑昨總督范時繹又於江南人家查出違禁圖識之
書是草野之間妖言惑衆之風未嘗止息地方官員儻
不能化導禁約轉從而崇信之是竟以身為庶民之倡
又何怪閭閻無知之人沉溺其中而不知覺悟耶凡造
為災異禍福之說者其言不驗則為害尚小儻天時氣
數偶與其言相合一二則信者愈衆而為害愈大甚至

心懷不軌之徒借此妖言妄興兵革荼毒生靈不可不防其漸也滿洲八旗大臣弁兵等皆國家干城腹心之寄況我滿洲忠義之氣技勇之才實為人所莫及果能安分循理盡忠孝之道無邪僻之行自然上邀

天地之恩永受國家之澤書曰惠迪吉從逆凶又曰作善降之百祥作不善降之百殃爾等但當於己身求之為善必獲善報為惡必獲惡報所謂如影隨形也奈何舍可以獲福之正理而信從姦民無稽之言被其牽累輕

則罹於刑罰重則喪及身家不亦可憫之甚乎大凡為
欺人惑衆之說者皆市井鹵頑無賴之輩或胸懷不軌
冀以搖動人心或貧困無依欲以騙取財物爾等試思
之天下焉有修道前知之人不遯跡於清淨寥廓之鄉
而奔走紅塵與世俗相徵逐者乎凡我滿洲漢軍官弁
兵丁等世受國恩共矢尊君親上之素志豈肯聽姦人
妖妄之言而遂為其所搖動但恐漸染日久有邪說在
其意中而遇有委用使令之時或稍存疑貳之念則所

關匪細故不得不訓誨開導之於平時使之恍然醒悟也著將此旨通行曉諭八旗及各處駐防弁兵等共知之

雍正十二年甲寅五月壬辰

上諭八旗都統等向來八旗官員遇有吉凶之事競尚繁華恣意糜費以致兵民效尤罔知撙節大有累於生計朕屢降訓諭并令九卿等按其品級分別等次酌定規條頒行已久伊等自當體朕教養之苦心各循分位謹

守章程以為仰事俯育之道乃近聞八旗人等仍有未
改陋習以誇多鬪靡相尚者不知聖人教人以生養死
葬合禮為孝又曰禮與其奢也寧儉喪與其易也寧戚
朕之教人亦即此意如父母之祭葬必以耗財為孝獨
不思蕩費家產以致不能顧恤品行辱及先人其不孝
也更為何如子女之婚嫁必以厚資為慈獨不思無所
貽謀以致不能養育子孫饑寒困苦其不慈也更為何
如況越禮踰分之事但覺可耻更有何榮朕之提撕警

覺已至再三而庸愚之人尚未醒悟今特再行宣諭該都統等務須諄切化導並不時稽察俾八旗人等遵照所頒定例實力奉行毋得陽奉陰違負朕崇儉黜奢維風訓俗之至意

十一月壬午

上諭內閣朕聞閩省漳泉地方民俗强悍好勇鬪狠而族大丁繁之家往往恃其人力強盛欺壓單寒偶因小故動輒糾黨械鬪釀成大案及至官司捕治又復逃匿抗

拒目無國憲兩郡之劣習相同而所屬之平和南勝一帶為尤甚朕思上天陰臨下民與以至善之性故云民之秉彝好是懿德雖五方風氣不齊而本善之性則有善而無惡漳泉之民亦未有天秉獨異者其所以不善之故則因俗尚囂陵漸成積習耳聞目見皆剽悍桀驁之風而無禮讓遜順之氣遂令本然至善之性陷溺而不自知也其中即有善良之人亦不過自潔其身實難以數人之力挽風俗之澆漓朕自臨御以來屢頒諭旨

訓迪內外黎庶詳明諄切至再至三自通都大邑至僻壤遐陬咸使之家喻戶曉而各省民風漸能奉法循理不敢蕩檢踰閑且如最難化者莫過苗蠻犇獍之人近亦頗知革面革心有欣欣向化之意豈漳泉內地之民轉不如苗衆等之悔過遷善革薄從忠而甘於自暴自棄陷身法網乎朕心深為不忍特降諭旨切加訓導易曰積善之家必有余慶積不善之家必有余殃書曰作善降之百祥作不善降之百殃此言善惡感召之機捷

於影響作姦犯科之人既為王法所不宥必為天理所
難容禍福利害之間判然兩途則爾等亦何所憚而不
為善何所利而為不善乎大抵居鄉之道親睦為要保
身之道循分為先毋以強陵弱毋以富欺貧毋以智侮
愚毋以衆逼寡毋為行險僥倖之事毋為干名犯義之
行父老子弟聯為一體鄰里鄉黨視若一家相友相助
息訟息爭使朝廷旌為義鄉有司表為仁里身名俱泰
刑罰不加天下樂利之事安適之境無過於此况閩省

文風頗優武途更盛而漳泉二府人材又在他郡之上
歷來為國家宣猷効力者實不乏人獨有風俗强悍一
節為天下所共知亦為天下所共鄙何不翻然醒悟共
相勉勵而成禮義仁讓之鄉乎著該督撫仰體朕心時
加訓誡更立勸懲之法實力奉行務俾俗易風移以副
朕一道同風之至意

大清世宗敬天昌運建中表正文武英明寬仁信毅大孝
至誠憲皇帝聖訓卷二十六

欽定四庫全書

史部

世宗憲皇帝聖訓卷

二十七至三十

臣永瑤恭校

編修臣裴謙覆勘

總校官原任中允臣王燕緒

校對官中書臣王璣

謄錄監生臣藍嘉璠

欽定四庫全書

大清世宗敬天昌運建中康正文武英明寬仁信毅大孝

至誠憲皇帝聖訓卷二十七

治河

雍正元年癸卯正月癸未

上諭大學士等前年因黃河衝決

皇考特遣年鈕齊蘇勒等堵築修理堤工一切完竣交與

楊宗義乃楊宗義不能時時加謹防守致修築之處又

復衝決經九卿議將楊宗義革職拿交刑部從重治罪
皇考從寬恕免將一切河工令其効力贖罪今被衝決之
堤工俱已合龍仍著楊宗義加謹防守不時修築春日
冰融之先務期預為防守堅固斷不可似從前疎忽又
致衝決果能加謹防護即可贖其前愆如將已完堤工
再致衝決朕必重治其罪

五月戊戌

上諭河道總督齊蘇勒漕運總督張大有山東巡撫黃炳

歷年漕船遲滯皆由運河淺阻運河之水全賴山東諸湖蓄水以資灌注近歲諸湖漸就淤積附近居民或侵占耕種以致水少不能引以濟運今宜乘夏秋雨水之時預為蓄水之計爾諸臣應各留心相度凡沿河近地已經成田者不必追究其未經耕種者當湖水稍落速宜嚴禁不可仍令侵占至諸湖隄防務須修築堅固引河開座務須啓閉得宜則湖水深廣運道流通將來漕艘更無阻滯之虞矣

七月甲午

上諭工部沿河州縣向有額設河夫自百名至數十名不
等興工則併力濬築工停則分遣巡防損者隨補塌者
隨培修搶擁護俱係熟諳夫役故雖偶有衝決不能為
患近聞管夫河官侵蝕河夫工食每處僅存夫頭數名
遇有工役臨時僱募鄉民充數塞責以致修築不能堅
固損壞不能隄防冒銷誤工莫此為甚嗣後著總河及
近河各省巡撫嚴飭河道不時稽查按冊覈實禁絕虛

冒儻有仍前侵蝕貽悞河防者即行指名題叅

雍正二年甲辰閏四月己亥

上諭兩江總督查弼納署江蘇巡撫何天培河道總督齊
蘇勒漕運總督張大有等京口一帶運河為南北漕運
咽喉歷年以來挑濬淤淺皆係丹徒丹陽兩縣百姓派
辦工役物料俱出民間殊屬偏累此運河乃抗嘉湖蘇
松常六郡共濟之河而獨累兩邑之民其何以堪朕深
為軫念今後須確估每年經費悉心會商或令地方官

支用地丁錢糧或令河員專司其事於河帑內動支開銷無致累民更聞六郡向有協濟之例抑或共襄工費以濟運道爾等確議奏聞以副朕愛惜黎元至意

雍正三年乙巳七月乙卯

上命內閣學士何國宗等閱視河道

諭曰運河關係重大言者皆似近理而議論多有不同今蔣廷錫條奏款項爾等前往詳加閱看凡泉源湖身與各水源流地方形勢務須身到測看方得確準定議不

可苟且草率意為揣度以致後日勢不可行河道總督
凡黃河所經皆其管轄豈能處處親到即河屬官員偶
有所見亦未敢輕易舉行爾等將儀器輿圖一併帶去
再有算法館行走明白測量人員著何國宗指名舉奏
二人帶去詳加測量或將廷錫條奏款項之外有關係
運道應查看修理之處亦逐一審視會同該督撫詳議
具奏務期一勞永逸爾等於八月二十日起身乘驛前
去儻遇無驛遞之處爾等輕騎減從該撫照料前往總

河齊蘇勒現在堵築黃河決口爾等此去先看漳河衛河後到濟寧則總河堤工事完便可會同閱看儻該督撫有緊要事務爾等或稍候數日或躬往就之勿致貽悞地方

丁巳

上諭河道總督齊蘇勒等今歲立夏以來雨水過多朕念黃淮伏秋兩汛必然水勢浩瀚甚以為憂所以從前批發嵇曾筠奏摺有無日不神馳淮黃兩岸之語今據田

文鏡奏稱儀封縣南岸大寨蘭陽縣北岸板廠後兩處衝開決口各十餘丈朕反躬惕厲夙夜不安其衝決堤工可星速會同副總河嵇曾筠督率各屬河員併力搶築務期永久堅固其一帶危險工程亦當增卑培薄預為之防至被災人民著速委能員實心確查應賑恤者即動正項錢糧賑恤衝沒田地詳加估勘應豁免者題請豁免朕從前曾命將河屬官員分別議敘今儀封蘭陽既被衝決其疎防官吏例應叅處今止停其議敘不

必叅處并從寬免其賠修

十二月己丑

上諭河道總督齊蘇勒宿遷以下因黃河決口尚未堵成
黃河大溜不能暢直通流至有淤淺一二處水勢急溜
河身復多沙礫該地方官槩不實心料理以致回空漕
船至此不無阻滯儻冬底春初決口尚未合龍河溜不
歸故道宿遷運河一二淺處明年重運漕船定多梗阻
干係甚大該總河當嚴飭河員上緊堵築必於桃汛之

前將宿遷決口修築堅固其淤淺處加工挑濬則來歲糧艘重運方無遲悞之患

雍正四年丙午七月甲辰

上諭九卿據奉使閱河內閣學士何國宗等條奏河道事宜河南小丹河一件何國宗等與田文鏡嵇曾筠兩議具奏何國宗等乃一己之見田文鏡嵇曾筠身在地方所見必確著照田文鏡嵇曾筠所議行其山東疏濬泉源一件何國宗等議設管泉通判一員甚是著照所請

行山東挑濬馬頰徒駭二河前經陳世倌差委道員徐德俶辦理此處工程緊要徐德俶不稱此任著御史尤清王之錡各管一處聽陳世倌調度不得自立意見其高家堰加修堤工關係緊要若於歲修案內逐漸增修恐致遲緩著照何國宗等所議即動正項錢糧作速估計興修著九卿會議具奏

十月壬申

上諭河道總督齊蘇勒等據奏報秋汛情形年來河水甚

大在工人員甚屬効力應分別等次報部議敘以示嘉
獎夫獎勞賞功乃國家激勸臣工之大典亦上司鼓舞
屬員之要務必須秉公持平方足以服衆心而收實效
此次舉報河工人員務秉公心勿徇情面以副朕加恩
河員之至意

雍正五年丁未十二月戊申

上諭工部向來漢軍得補河員凡經手一切工程修築既
不完固防守復多疎虞上下通同侵欺浮冒虛糜國帑

甚至冀幸堤工之衝決以遂其侵那開銷之私計種種弊端朕所洞悉今總河齊蘇勒悉心釐剔一應工程整頓料理俱有成效凡屬河員亟宜洗心滌慮痛改前非各自奮勉蓋河工關係運道民生河官之責任較之他員實為重大務須悉知利害殫心竭力若塗飾耳目苟且塞責經該督題叅定加重處斷不能寬也著將此旨遍諭河員互相儆戒以副朕廑念運道民生之至意

雍正六年戊申正月癸丑

上諭內閣從前將江南河兵一千名撥往河南教習椿埽
原議回日裁汰但此兵丁既熟悉椿埽尚可留用今詢
河道總督齊蘇勒南河仍有需用之處此一千兵丁不
必裁汰著仍留營差用河工差遣武弁之處甚多每營
止有守備一員管轄亦屬不敷且缺少武職大員著添
設叅將一員遊擊二員守備十員令叅將統轄遊擊分
管名為河營

雍正七年己酉二月庚辰

上諭內閣齊蘇勒練達老成深悉河工事務是以授嵇曾筠為副總河專管北河而令齊蘇勒兼理南北兩河之事今尹繼善新管河務朕意欲令其與嵇曾筠分任南北兩河又思治河之道必合全河形勢通行籌畫方可疏導安瀾若分令兩員管理恐有推諉掣肘之處著怡親王大學士等會同署蘇州巡撫王璣及九卿內本籍江南河南山東之人通曉河務者詳悉速議具奏

七月辛亥

上諭內閣黃河堤岸乃運道民生所關最為緊要年來殫心經理增卑培薄幸堤工堅固共慶安瀾獨是工程報竣例應歸汎修防而額設河兵堡夫只能修補水浪衝激之區防備臨險搶護之用至於堤身一年之內風雨淋漓車馬踐踏漸至侵蝕者亦勢所必有而堤遠工多不能責諸寥寥兵役也朕留心訪察已久又復詢問通曉河工之人知故明總河潘季馴每歲派夫加高五寸載在河防一覽即從前河臣靳輔亦有每兵一名招募

幫丁四名給以堤內空地耕種免糧歲令加土五寸之
議與朕計慮之處實相符合朕思堤工雖千有餘里若
按丈每年加修五寸計費不過三四萬兩儻置之不議
一年剝削四五寸合十年而計之其所費之多恐有不
止於加修之數者况河流漲漫不時難以預料何若逐
年增修保固為未雨綢繆之計也著南北兩河總督尹
繼善嵇曾筠悉心商酌具奏至於州縣派夫銅弊久經
嚴革而募丁給田之說亦不可行其每年歲修之費或

動用藩庫帑金或於臨河州縣應解公用銀兩內就近支給若有不敷仍於藩庫撥補亦著河臣一併定議具奏

十一月甲戌

上諭內閣朕思治河之道惟有使黃水暢流無所壅滯則永慶安瀾然欲黃水無所壅滯必須保固高家堰堤工使清水力能敵黃且以助其暢流之勢則河工永遠無慮從前齊蘇勒雖將石工稍加幫修而朕以爲不若多

費帑金於堤工險要之所及單薄之處俱加修石工務令堅固高厚以爲久遠之計前孔毓珣陞見時朕以此諭之伊亦深以爲然可見高堰堤工乃必應加增修理者也著發戶部帑銀一百萬兩交與孔毓珣尹繼善籌畫相度有應豫備物料之處即於歲內採買早爲豫備再著汪漕對琳張坦麟吳昌祚前往淮上協同河臣等悉心辦理

十二月壬寅

上諭江南河道總督孔毓珣據奏清口引河工程俟明年水汛時相度妥確然後試行猶非探本尋源之策若能使淮強黃弱勢可相敵即不行挑濬亦必暢流無滯不然徒恃此數道引河恐湖水未必能應手濟用也惟速將湖南一帶石工加高增厚一例修砌堅固俾湖水無涓滴漫溢之虞其勢自強自當從清口暢流而出可免淤淺之患矣宜急為斟酌籌畫毋因慎重錢糧區區小見貽誤河防要務

雍正八年庚戌正月己卯

上諭江南河道總督孔毓珣等據奏修理高堰大工事宜朕不惜百萬帑金以衛民濟運工程當務久遠堅固一勞永逸此外即再增數十萬兩亦不為多若因省小費致誤大計則所費百萬仍屬虛用也堤工卑矮之區固應增高而單弱之所尤宜加厚可再詳加相度勘視切勿冒存小見凡有卑薄以及傾圯處悉將堤身拆砌務令自頂至底一律堅實期於永久獲益所需錢糧不必

限定此數

丁酉

上諭內閣北運河青龍灣修築減水壩竝挑濬引河工程
據怡親王等奏請交與侍郎何國宗督理監修朕思原
任侍郎牛鈕在北運河管工年久於地方情形甚為熟
練著與何國宗協同辦理其一應錢糧工程等項令都
統莽鵠立耿化祚副都統佛保副都御史二格會同何
國宗辦理稽查其減水壩金門及所開引河或應寬二

十丈或應寬四十丈及運河西岸可否另開減水壩並
何國宗查議各條是否妥協有裨河工之處爾等可詳
悉詢問牛鈕會同定議辦理

雍正十一年癸丑十一月己亥

上諭內閣年來江南河工因總河諸臣經畫有方調度得
宜是以湖河奠定民慶安瀾但河防關係重大將來河
務必得通曉熟練之人遵循分理斯克繼前功而全河
形勢非平日講求親身閱歷必不能冒有成算洞曉機

宜即修防堵築以及估工查料等事亦非經練熟諳備
悉利弊必不能隨時損益有裨工程是通曉河務之員
不可不預爲儲備也著每年在各部院揀選賢能勤慎
司官二員帶領引見派往南河學習河務酌量委辦估
工查料等事以二年爲期出具考語咨回本任如有操
守才具實堪任用者即行保奏留工酌量題補其不堪
學習者不必拘定二年於試用數月後即咨回原任另
行派員前往學習如此數年後通曉熟練者自不乏員

於河工諸務大有裨益矣

雍正十三年乙卯二月辛亥

上諭內閣朕聞河工官員每於裝運工料差役封捉船隻而所差胥役即藉端生事騷擾及至三汛搶工則稱裝運緊急物料百般需索甚至將重載之客船勒令中途起貨以致商船聞風藏匿裹足不前查河工裝運物料原有額設浚船即使搶築之時浚船或不敷用祇應僱募本地民船協濟運送原不必封捉客船阻遏商旅著

河道總督飭行所屬河員嚴行查禁

附水利

雍正元年癸卯九月癸巳總理事務王大臣等議
准浙閩總督覺羅滿保修築海塘事宜

上諭曰錢鏐時所築塘堤中間雖被冲壞至今尚有存者
數年來督撫等所修塘堤俱虛冒錢糧於不當修築處
修築以致隨修隨壞又聞赭山有三處海口今一處淤
沙壅塞水不通流若濬治疏通使潮汐不致留沙壅塞

則海寧一帶塘工方可保固言之者雖未必稔知然不可不留意抑或地方大臣恐糜費錢糧此等處雖明知而不顧也傳諭該督撫知之

雍正三年乙巳五月甲寅

上諭內閣江南浙江海塘已差尚書朱軾會同浙江巡撫查勘估議具奏但沿海黎庶全賴堅築海塘捍禦潮汐得以保全生聚事關民瘼朕時刻在念若塘工遲悞則海濱之人未能安居樂業所派効力人員雖經赴工惟

恐遷延時日驟難告竣亦未可定著巡撫張楷法海等
星速遴委幹員動支司庫錢糧立限堅築剋期報完務
使永保安瀾毋得因循延緩亦不得草率塞責貽誤民
生

雍正四年丙午四月庚辰

上諭大學士等去歲畿南被水朕軫念民生除截漕賑濟
種種加恩外又特命怡親王等親身前往查勘地理情
形以除水患以興水利令一切工程事務雖有分發効

力人員但地非素經人非素轄恐有呼應不靈之處必
得本處地方官公同實心協辦始克有濟且事權必欲
專一方可奏功凡直隸地方文武官於水利事務須
與分發効力人員秉公和衷協助如有漠視推諉及阻
撓者俱著怡親王題叅有實力奉公者亦著怡親王保
題

七月庚戌

上諭湖廣總督李成龍湖北巡撫鄭任鑰荊州長江兩岸

堤防關係民生最為緊要蓋因川湘二江之水匯歸於此易於泛濫聞今年雨水連綿水勢甚猛陸地之水為江水所拒不能減退以致低窪之地禾苗淹沒又聞往年黃灘等處堤岸兩次衝決江陵潛江等州縣田苗被淹甚為民害長江兩岸州縣雖每年各自興修然地方遼遠少有疎忽則民生重受其累爾等可公同商酌委員踏勘應否作何修築防護之處悉心妥議具奏

雍正五年丁未正月乙卯

上諭內閣地方水利關係民生最為緊要如江南戶口繁庶宜更加修濬時其蓄洩以防旱澇向來屢有條奏之人但未經本省督撫奏請朕意亦久欲興修以資農務因海塘工程正在營治且水利事關重大必得實心辦事之人方有裨益即如目今畿輔水利賴有忠誠任事之怡親王始可興此大工不然則亦未敢輕易遽行也
我

皇考念切民依周知稼穡康熙四十六年巡省江浙所至

必細驗水土燥濕高下之宜詳考五穀種植之性

躬親講求將附近太湖及通江潮之處條分縷析特頒諭旨令江浙督撫於蘇松常鎮杭嘉湖地方疏濬河港以資灌溉修建閘座以便啓閉皆動用公帑錢糧不使絲毫出於民力恩至渥也乃當時督撫諸臣不能實心仰體惟以虛文奉行糜費帑金二十餘萬大都飽於官吏之侵漁而無實效深可痛恨朕即位以來事事仰繼皇考之貽謀永圖民生之遠計本欲俟直隸水利興修之

後令怡親王前往江浙地方相度情形商酌興修之舉
今巡撫陳時夏特行奏請且稱費用不過十餘萬兩即
可成功據陳時夏陳奏應是地方不可遲緩之事副都
統李淑德昔任江南松江府同知諳習水利事宜曾經
條奏頗為明晰原任山東巡撫陳世倌年力精壯現在
閒居著李淑德陳世倌會同巡撫陳時夏總河齊蘇勒
總督孔毓珣悉心踏勘詳加酌議儘河工緊要齊蘇勒
不能親身前往即行商酌定議具奏凡建立閘座疏濬

河流務期盡除淤塞以杜泛溢之虞廣蓄水泉以收灌溉之益其一應公費俱動用庫帑支給一切工程交與李淑德陳世倌監督辦理竝諭吏部將各部現任司員候選司員及府州縣人員內有具呈願往効力者挑選十餘人帶往江南不必令出貲財惟令辦理事務交李淑德陳世倌二人酌量委用

二月癸酉

上諭內閣朕聞陝西鄭渠白渠龍洞向來引涇河之水溉

田甚廣因歷年既久疏濬失宜龍洞與鄭白渠漸至淤塞堤堰坍塌醴泉涇陽等縣水田僅存其名深為可惜特令該督岳鍾琪詳酌興修今據該督親勘奏稱龍洞急宜挑挖鄭白渠務當疏濬更須修築堤堰建設閘口以俾堅久已於西安布政司備公羨餘銀內先動一千兩委員將龍洞鄭白渠及時挑濬其建閘工料約估銀七千兩請亦於司庫存貯羨餘銀內動用等語朕惟興修堤堰乃於民生大有裨益之事著動用正項錢糧俟

一切工程告竣造報工部查核務期渠道深通堤堰堅固俾農田得以永賴以副朕保惠元元之至意

十二月己亥

上諭內閣吳淞石塘當日勘估時於海潮紆緩之處酌量修築土塘蓋因工程浩大節省錢糧起見但東南財賦之區灌溉田畝保聚室廬全賴海塘捍衛朕思海勢衝激風濤旋轉難定土塘經歷年久未免可虞不若一例改築石塘為百姓萬年之利著該撫確行勘估不得惜

費省工苟且塞責務須堅固永垂久遠以副朕經理海疆愛養民命之至意

雍正七年己酉十二月辛亥

上諭內閣據署山東巡撫費金吾等摺奏疏濬山東濟寧嘉祥等縣及江南沛縣徐州等處水道使歸宿於海則山東江南二省歷來被水州縣皆成樂土朕思此項工程既於民生大有裨益則舉行不宜稽遲應先期派出官員前往專司督修之事以便備辦物料早動工程原

任侍郎阿克敦前在廣東署事任內尚無貪贓犯法等情今著寬免釋放命往水道工程効力以贖前愆再著原任巡撫陳世倌甘汝來前往與阿克敦同司督脩之事一切辦理機宜悉聽田文鏡嵇曾筠孔毓珣尹繼善籌畫調度其工料等費悉動帑金支給至在工差委人員聽阿克敦等酌量派用有應從京師帶往之員准其奏請帶往其湖廣革職糧道王恕著交與阿克敦等帶往辦事効力

雍正八年庚戌三月庚辰

上諭內閣寧夏地方萬民衣食之源在大清漢唐三渠水利是以定例每年疏濬修理使水流暢足民田均沾灌溉自歷年官員疎忽怠玩以致閘道堤岸損壞衝決日見淺窄而三渠之中惟唐渠為尤甚近來其口過低其稍過高水勢不能逆流而上多誤小民耕種之期雖每春定有歲修之例然不能以一月之工程整十數年之荒廢也現今兵部侍郎通智開濬惠農昌潤二渠於寧

夏水利自然明悉著會同光祿寺御史在甲即行查議
今歲預備物料明春動工修補務令三渠堅固俾邊境
黎元灌溉有資永享盈寧之慶

雍正十年壬子正月己卯

上諭內閣寧夏為甘肅要地渠工乃水利攸關萬姓資生
之策莫先於此是以朕特遣大臣督率官員等開濬惠
農昌潤二渠又命修理大清漢唐三渠以溥萬民之利
年來惠昌二渠及唐渠工程漸次告竣於民田大有裨

益其大清渠漢渠雖未竣工然聞連年加謹堵疊極力挑濬水澤已可敷用不過湃崖間座有應行修理之處可以從容經理非比唐渠之必應及時速成也目今甘省軍興之際輓運兵糧正需車輛茲因修理渠工又復僱車運送物料恐小民承應公事力難兼顧有悞春耕所當酌量變通以體恤民隱者查寧夏有專司水利之同知著將未竣之渠工交與該員照通智火在甲等所料估之處於每歲春工內分年陸續修理再令寧夏道

鄂昌勤加督率不時稽查務期工程堅固利濟有資使
民田永霑膏澤通智史在甲將各件與鄂昌交代清楚
即行回京其在工効力之文武官弁交與該署督查郎
阿計其在工之久暫訪其奉職之勤惰量其辦事之能
否應留陝題補委用者留陝題補委用應咨部請旨者
咨部請旨應發回本地者發回本地其現任武弁及兵
丁等派撥渠工効力者俱令各歸營汛在工夫役等交
與鄂昌將附近者令歸南畝遠來者酌量遣回

雍正十一年癸丑正月庚寅

上諭內閣江南范公堤為沿海之藩籬鹽場之保障原係商人捐辦工程聞現在殘缺甚多急應修築堅固現據兩江總督魏廷珍委員確勘料估著即一面具題一面乘二三月間作速興工使沿海窮民得以傭工餬口但工程綿遠需大員董理著交與協理河務西柱即行督率各工悉心查辦

雍正十三年乙卯正月癸酉

上諭內閣朕聞浙江海塘工程現在修理尖山已堵築三分之一人心甚是踴躍但夫役每日給工銀三分六釐稍覺不足今當初春之月水淺潮平正趨築工程之候著照引河挑夫例每日加足五分之數又聞從前採運石塊每方給銀八錢九分有零今運送多資人力著每方增銀六分俾夫役等工食寬裕努力修築早告成功以慰朕念

七月丙辰

上諭內閣浙江海塘工程關係民生最為緊要朕宵旰焦勞不惜多費帑金為億萬生靈謀久遠又安之計所以告誡在事臣工者已至再至三矣不料經理諸臣各懷私意彼此參差以致乖戾之氣上干

天和有今年六月風浪潰堤之事今雖勉力搶修尚不知能捍禦秋潮否至於建築石塘工程浩大若諸臣陋習不改仍似從前則大工何所倚賴朕再四思維大學士朱軾廉慎持躬昔曾巡撫浙江諳練塘工今雖年逾七

旬精神不逮而董率指示似尚能為朕以此詢問朱軾
自稱情願効力著由水路乘船前往令該部給與水程
勘合竝令沿途撥兵護送伊子朱必堦著隨伊父去朱
軾到浙之日稽察指授總理大綱至一切工程事務仍
著隆昇程元章汪濛張坦麟等照前辦理俱聽朱軾節
制若大臣中有懷私齟齬者著朱軾據實叅奏朕必嚴
加處分若文武官員等有營私作弊或怠玩因循者朱
軾即行糾叅從重治罪朱軾未到之先所有應辦工程

物料著隆昇程元章等上緊辦理毋得藉口等候欽差
徘徊觀望以致稽遲

大清世宗敬天昌運建中表正文武英明寬仁信毅大孝
至誠憲皇帝聖訓卷二十七

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷二十八

蠲賑一

康熙六十一年壬寅十二月癸丑

上諭戶部

皇考御極六十餘年澤周兆姓恩洽人心凡巡幸所經州
縣小民無不除道清塵趨事恐後古北口一路為我

皇考每年行幸之地農工商賈皆得瞻仰

天顏親承膏澤今聞

皇考賓天民心倍深悲痛朕念此路百姓歷年殫力宜加
恩恤著將宛平順義懷柔密雲平谷五縣昌平一州雍
正元年正項錢糧盡行蠲免又

陵寢一路此時正當修道亦宜加恤著將大興三河二縣
通薊遵化三州雍正元年正項錢糧亦盡行蠲免爾部
即遵諭行

雍正元年癸卯正月庚戌

上諭山東巡撫黃炳朕纘承大統父母斯民普天之下皆
吾赤子凡身任封疆者當深體朕心遇有災荒及時賑
濟使窮黎實被其澤據奏東兗兩屬去歲二麥失收小
民未免困苦直隸河南鄰境之民資生無策亦有攜家
覓食者朕覽奏惻然爾奏欲各捐已資以為賑濟朕思
爾等資從何出勢必仍取之於民是賑民實以累民也
不如動用倉儲遴選賢員確查乏食窮民分路賑濟小

民庶得均霑實惠至鄰省流移之民亦宜一體撫恤毋令失所又奏請平糶倉穀於民食大有裨益必得實心任事之人方副朕惠養元元之意再奏請漕糧十萬石分貯各縣往年曾經屢次截留此項曾否支用所存多寡併如何分貯之處著具本奏聞

二月丙寅

上諭戶部治天下要道莫過安民朕繼承大統以來軫念蒼生痼瘼時切直隸山東河南連年歉收特命緩徵額

賦遣官賑濟至於京師每年自十月初一日起至三月二十日止五城設立粥廠令巡視五城御史煮粥賑飢今尚在青黃不接之時著展期一月煮粥散賑至四月二十日止但四方窮民就食來京者頗多著每日各增加銀米一倍務使得霑實惠以副朕憫念窮黎至意

三月辛丑

上諭戶部陝省自軍興以來大兵駐劄運送糧餉供支草豆無一不需民力

皇考每為軫念今當大沛恩膏子惠元元所有康熙六十年以前陝西全省除借給籽種著該督撫查明定議分年帶徵外其餘凡有民屯衛所實在未完銀米豆草悉予蠲免倘有不肖官吏以虧空捏稱民欠濫邀曠典者一經發覺罪在不赦該部作速行文毋得遲留

甲辰江蘇巡撫吳存禮奏請寬免蘆課等項銀兩上諭戶部江蘇等屬民欠地丁等項銀一百三十一萬餘兩內蘆課等項銀九萬八百餘兩雖非恩詔內應行豁

免之項但歷年最久儻行催徵窮民必致受累著一併
豁免

四月癸亥

上諭總理事務王大臣等朕臨御以來時以天下蒼生為
念凡自外省來京之員各處雨暘豐歉必面加詳詢蓋
欲周知民隱也今差往致祭華嶽侍讀學士田文鏡回
京朕詢彼經過地方情形與百姓生理據奏山西平定
州壽陽縣徐溝縣祁縣等處雨澤歉少民間生計維艱

汾州府屬地方得雨亦未霑足地方官現在徵比錢糧夫巡撫以撫綏地方愛養百姓為職今平定壽陽等處黎民饑饉竝未奏請賑濟緩徵反行催科小民何以存濟此皆因伊等去年曾奏得雨今欲掩飾前言甚屬不合巡撫德音布政使森圖著交該部察議仍即命侍讀學士田文鏡會同巡撫德音率領地方官員將平定等四州縣饑民速行賑濟務使恩澤實霑撫養得所毋羈時日以致羣黎失業爾等即傳諭遵行

雍正二年甲辰正月甲辰戶部議覆山東巡撫黃炳奏康熙六十年并雍正元年散賑銀米著落各官賠補

上諭曰地方偶有災祲朕即軫念窮黎遣官散賑動支正項銀米務使均霑實惠此拯救災黎之至意也如將散賑銀米不入正項開銷著落各官賠補殊非朕特遣官員拯救災黎之本意巡撫黃炳所奏康熙六十年散賑用過穀石及雍正元年散賑用過銀兩二疏俱交與該

部准入正項報銷

八月甲午

上諭戶部前因江浙督撫等摺奏七月十八十九等日驟雨大風海潮泛溢衝決隄岸沿海州縣近海村莊居民田廬多被漂沒朕即密諭速行具本奏聞賑恤但思被災小民望賑孔迫若待奏請方行賑恤致時日耽延災民不能即霑實惠朕心深為憫惻著該督撫委遣大員踏勘被災小民即動倉庫錢糧速行賑濟務使災黎不

致失所其應免錢糧田畝即詳細察明請蠲凡海潮未至之村莊不得混行濫冒至於緊要隄岸衝決之處務須速行修築無使鹹水流入田畝朕念切痼瘼務令早霑實惠該地方官各宜實心奉行加意撫綏俾凋瘵得蘇生全速遂以副朕勤恤民隱至意

十月癸巳戶部議覆直隸巡撫李維鈞疏奏直屬九郡豐收惟霸州東安大城武清玉田寶坻梁城所七州縣所田禾偶有淹損本年錢糧請緩至雍

正三年帶徵應如所請

上諭曰霸州等七州縣所被水村莊朕已諭巡撫李維鈞將倉糧發賑念此時小民生計維艱若將今歲錢糧歸於明歲帶徵則新舊之賦輸納於一年之內勢難兼顧爾部行文該撫著將霸州等七州縣所被水村莊今年應徵錢糧內或應有蠲免之處詳查議奏以紓民力

雍正三年乙巳三月丁未

上諭戶部豫省陽武封邱中牟三縣從前兩被水災聞其

近隄地畝有被水漲漫流為支河者有水去沙停變為沙灘者有地土變為鹹鹺者昔年特遣大臣專司堵築又念民間輸賦維艱於蠲免之外將應納錢糧寬期分年帶徵今幸修築功成河流順軌民獲安居但念被災之後元氣未復若將新舊錢糧竝徵民力未免竭蹶且恐被水與停沙之地以及鹹鹺之區一時未能耕種則國課何由而辦朕心深為軫念著戶部侍郎托時前往會同巡撫田文鏡將三縣昔年被災地方悉心查勘其

地土被災之輕重及荒地成熟之遲早與舊欠新徵之錢糧應徵應免之處一一確實分別定議

丁巳管理戶部事務怡親王奏請酌減蘇松浮糧
上諭曰蘇松浮糧常座

皇考聖懷屢頒諭旨本欲施恩裁減乃彼時大臣以舊額相沿已久國課所關綦重數以不應裁減固執覆奏凡國家大事因革損益必君臣計議畫一始可舉行若皇考違衆獨斷即非詢謀僉同之意且恐一時減免僅後

來國用不足又開議論之端是以從衆議而中止然
聖慈軫念蘇松誕敷渥澤屢蠲舊欠以紓民力其數較他
處為多是亦與裁減正額無異也今怡親王等悉心籌
畫斟酌奏請朕仰體

皇考愛民寬賦之盛心准將蘇州府正額銀蠲免三十萬
兩松江府正額銀蠲免十五萬兩論語曰百姓足君孰
與不足易曰損上益下民說无疆朕但願百姓之足時
存益下之懷用是特沛恩膏著為定例俾黎民輕其賦

稅官吏易於催科可飭令該地方官知之

五月丙辰

上諭戶部去歲江浙海潮衝溢沿海場竈淹沒之處甚多兩淮鹽政所屬地方經噶爾泰奏聞朕即發帑賑恤并將雍正元年二年竈戶未完折價銀四萬餘兩悉行蠲免其兩浙鹽政所屬地方該巡鹽並未被災之處題報今謝賜履摺奏去秋海濤飄決情形兩浙與兩淮無異朕一視同仁務使均霑膏澤著將華亭婁上海海寧

餘姚蕭山慈谿等縣雍正元年二年未完場課銀兩悉行蠲免

九月丁酉

上諭大學士等前因天津倉廩潮濕不能收貯米石故停止截留今據蔡珽奏稱天津倉廩雖不能貯米可分發各州縣以備賑濟請仍截留二十萬石等語著戶部速派賢能滿漢司官各一員前往天津會同倉場總督托時將河南小米截留二十萬石一面行文蔡珽令其酌

量應貯米之州縣撥派官員於天津地方領運收貯備賑前李維鈞奏請賑濟一月朕思賑濟原不可拘定日期著加賑三個月務令小民得所見今遣增壽等前往奉天採買米石運至天津可即行文伊等於米石之外採買高粱或十萬石或七八萬石一併運至天津於賑濟大有裨益爾等即遵諭行

十月戊子

上諭都察院五城煮賑舊例自十月初一日起至次年三

月二十日止每城每日發米二石柴薪銀一兩今歲直隸各州縣截留漕米二十三萬石仍復運送通倉米十萬石令散賑平糶但恐來京就食之民尚多每城日給米二石或不敷用著每日各增米二石柴薪銀亦倍之各該巡城御史親率司坊官散給爾等不時稽查務使窮民得霑實惠

十一月乙未

上諭大學士等今年直隸州縣被水小民乏食朕軫念殷

切除截留漕米發給常平倉穀外又將通倉米六成以上者著托時陳守創親交余甸蔡起俊運赴天津分散賑糶今朕訪得所發之米朽爛不堪其高者不過三四成低者全屬灰土朕軫念災黎宵旰憂勞無時或釋乃托時等全不仰體朕心將此無用之米運給有名無實小民何所資藉此已運成色米十萬石著賞給各處窮民再另發六成以上米十萬石令托時陳守創余甸蔡起俊運往天津再今歲秋季所發官俸兵糧米色俱不

好嗣後若再如此必從重治罪康熙五十五年曾發通倉米五萬石分貯各州縣備用歷年已久聞俱陳腐甚為有司之累著從寬豁免

十二月丁亥

上諭大學士等今歲直隸地方被水小民乏食朕軫念維殷已截漕發粟多方賑恤但恐停賑之後正值東作之時農民謀食無策著再加賑一月如從前所發之米不足賑糶著署總督蔡珽確查奏請增發米石以副朕愛

養黎元之意

雍正四年丙午六月癸酉

上諭江西巡撫裴率度聞福建今年春夏以來雨水稍多
天氣寒冷禾苗興發甚晚目前米價昂貴民食頗覺艱
難江西素稱產米之鄉況去歲今春皆獲豐收理宜通
融以濟閩省近聞江西地方官遏糴不令出境甚非情
理著將江西存倉之穀碾米十五萬石動用腳價遴委
能員即速運至閩省交界地方先期知會閩省督撫委

員領去分給各地方以濟民食毋得遲緩其動用腳價作何還項可與閩撫酌議動用倉穀作何還項可與兩江總督酌議具奏

甲戌

上諭戶部江南泗州逼近黃河地勢低窪因去年黃水衝決之岸尚未合龍今年四月間水勢漫溢以致泗州地方禾麥又被淹損朕心深為軫念著布政使石麟動支庫銀二萬兩親自前往泗州確查被災之民逐戶散給

勿令鄉約里長及胥吏人等絲毫侵蝕務使窮民均霑實惠不至失所

十月甲子

上諭戶部從前因泗州逼近黃河常有水患今歲又復被水特命布政使石麟動支庫銀二萬兩親身帶往散給窮民此朕格外之恩也今魏廷珍奏稱已奉諭旨動庫銀二萬兩賞給無庸再議賑恤等語殊非朕格外加恩軫念窮黎之意且賑濟之例應照被災分數酌定多寡

若云已加特恩便不照常賑濟儻恩賞之數不及應賑之數則小民因此轉未蒙恩矣著交與魏廷珍仍照定例將應賑之處確核具題散賑

十一月己亥廣東巡撫楊文乾奏歸善博羅等十一縣濱海被水秋收歉薄請加賑恤

上諭九卿上年廣東福建二省所屬郡縣有數處歉收是以今年春夏米價昂貴已諭該督撫等設法接濟撫恤貧民今年福建雨澤調勻秋成豐稔廣東早禾大收惟

八月間雨水稍多恐晚禾收成歉薄至明歲青黃不接之時小民不無乏食之慮此時正當預為籌及應如何運送米穀赴廣備用著九卿確議該撫所報濱海被水之十一縣應如何賑恤之處一併速議具奏

雍正五年丁未六月丁未

上諭內閣據怡親王奏稱玉田縣還鄉河隄岸衝決附近之田禾廬舍被淹傷損朕心深為軫念著散秩大臣常明率同御史勒音特錢兆沆二人前往查勘竝帶帑金

二萬兩速行賑濟若有動用倉穀之處將本縣倉穀即行動用務使小民得所不致流離再被水地畝本年應納之錢糧朕本欲全免恐此時有已經完納者著行緩徵明年錢糧蠲免一年該地方有司應加意撫綏以副朕愛養窮民之至意

七月乙卯

上諭戶部湖北地方今年四五月間雨水稍多江流泛漲沿江之地罹於水患如武昌府屬之咸寧蒲圻嘉魚三

縣武昌武左二衛漢陽府屬之漢陽漢川二縣荊州府屬之江陵荊州衛黃州府屬之黃陂黃梅二縣田畝被淹米價漸昂朕心深為軫念著該地方官加意撫恤朕又思此縣衛數處既經被水仍令其輸納錢糧民間未免竭蹶著將今歲錢糧全行蠲免儻有已經完納者准作雍正六年應完之項再各省藩庫俱有酌留銀兩備用因湖北竝無存剩銀兩是以未曾酌留今既有蠲免之州縣恐俸餉公用等項一時或有不敷查湖南藩庫

有存貯銀三十萬兩著將銀十萬兩就近撥解湖北布政司再將兩淮鹽課撥動二十萬兩以十萬兩解送湖南補項以十萬兩解送湖北備用又聞湖南近江州縣亦有數處被水著總督巡撫確實查明亦照湖北咸寧蒲圻等縣衛之例將今歲錢糧蠲免

戊辰

上諭內閣朕前令該督撫行查湖南被水之地今據署湖南巡撫布蘭泰奏報十一州縣衛被水甚為可憫著照

湖北被水之地一體加恩雖據布蘭泰奏稱已經動用銀兩委員賑恤朕恐所發之銀或未敷用著再動用司庫帑銀二萬兩作速確查散給務使窮民均霑實惠如王國棟已經到任即交與王國棟料理至湖南湖北近江濱湖之地雖地勢低窪易至泛溢然居民常被水患朕心甚為憫惻或有隄岸未修或有疏濬不力俟邁柱到任後會同湖北湖南巡撫悉心商酌將如何興修防護之處詳悉定議又聞近日湖南米價稍貴之時即有

姦民撐駕小舟指稱被水災民求乞米糧而搶劫客舟財物者凡屬良民斷無有因一時被水米貴而肯甘心為盜之理此皆平素兇惡匪類胸懷詭詐乘地方稍有旱潦遂以迫於饑寒為名煽惑衆心妄行不法甚屬可惡據布蘭泰奏稱生事為首之姦民已被擒獲著該撫嚴加審訊或另有指使之人或尚有兇惡之黨究問明白分別首從定擬

八月辛亥

上諭湖廣督撫等湖廣近江濱湖之州縣如咸寧蒲圻數處今歲被水特頒諭旨將今歲錢糧全行蠲免沔陽潛江監利一州二縣及衛所屯田皆屬低窪之地與咸寧等處相同照例將今歲錢糧全免其有已經完納者准抵算明年額賦朕因軫念楚省窮民已發帑銀二萬兩令該督撫加意賑恤此銀儻有不敷湖北見有買穀備用之銀六萬兩即將此項銀兩動支於應用之州縣分給賑恤務令均霑實惠

九月乙丑

上諭戶部朕聞江南浙江近水之地數處被水軫念窮民朕懷殷切著江南總督范時繹動用庫銀二萬兩於上下兩江應用之處散賑浙江巡撫李衛動用庫銀一萬兩於應用之處散賑令窮民均霑實惠

十月戊戌

上諭署直隸總督事宜兆熊據奏霸州雄縣等二十四州縣被水窮民已蒙恩散賑其各屬被水地畝暫請緩徵

朕念直隸濱河之地易於被水用沛特恩遣官發帑加意賑恤此乃格外惠及窮民之意至於被水之處仍應勘明分數題請照例蠲恤不得因已經遣官發帑遂不照定例遵行竝諭各省知之

己酉

上諭戶部朕御極以來愛養黎元勤求治理各省錢糧耗羨原非應有本欲悉行革除因廣為諮詢留心體察知州縣官員實有必不得已之用度若將耗羨盡行禁止

在廉謹之員實難支持而貪污不肖之徒勢必藉口無以養廉恣意苛索百姓轉受其累是以錢糧之有火耗由來已久各處皆有相沿之例其數亦多寡不同惟應於火耗過重之員重治其罪若有司官酌量收納不加重苛取於民小民亦覺相安此各省之大勢也查各省之中賦稅最多者莫如江南之蘇松二府浙江之嘉湖二府每府多至數十萬地方百姓未免艱於輸將其賦稅加重之由始於明初洪武時四府之人為張士誠固

守故平定之後籍諸富民之田以為官田按私租為稅額夫負固之罪在士誠一人而乃歸咎於百姓加其稅賦此洪武之苛政也有明二百餘年減復不一我朝定鼎以來亦照明例徵收蓋因陸續辦理軍需經費所在未便遽行裁減我

皇考聖祖仁皇帝常論及此雍正三年朕仰體

皇考多年寬賦之

聖心將蘇松二府額徵浮糧豁免彼時頒發諭旨甚明本

欲一體加恩於嘉湖二府因浙江風俗澆漓正須化導
不便啟其望恩倖澤之心故爾暫止今見浙俗漸次轉
移改而遷善朕心深慰用沛恩膏查嘉興府額徵銀四
十七萬二千九百餘兩湖州府額徵銀三十九萬九千
九百餘兩俱著減十分之一二府共免銀八萬七千二
百兩有奇永著為例至於浙省地方各官養廉之資更
無別項而耗羨則每兩不過五六分以通省額徵之數
計之每年耗羨僅十四萬兩自督撫將軍副都統學政

及藩臬道府同知通判州縣等官共一百二十員凡用度公費皆取資於此似不足支應除嘉湖二府錢糧已經減免外著將杭州寧波紹興台州金華衢州嚴州溫州處州等九府額徵銀二百五萬兩按十分之一内存半計算得銀十萬兩賞給各官以為養廉合之州縣耗羨則有二十四萬兩從雍正六年為始俱著提解司庫令該撫酌量官職之大小府州縣地方之繁簡秉公派定數目奏聞餘銀存為本省公事之用朕軫念浙省官

民施恩格外百姓賦稅之稍重者則將徵額之數特賜裁減官員用度之不足者則將惟正之供賞給養廉朕今施恩於官者實施恩於民之意無非欲百姓等催科不擾皆樂業於田間官員等俯仰裕如咸盡心於官守儻官員不知副朕愛民之苦心仍有作姦犯科隱糧逋賦及侵漁公帑剝削民膏者在天理國法俱難姑容加以重懲更無可貸思之慎之

雍正六年戊申三月癸丑

上諭戶部君民上下之間休戚相同本屬一體論語曰百姓足君孰與不足是民間之生計即國計也自古人君無不恤民之災濟民之困者而至於歉歲蠲免之數往往多寡不同者則時勢羸絀為之出於不得已也如明洪武時凡水旱地方稅糧即與蠲免成化時凡被災之地以十分為率減免三分弘治時全荒者免七分九分者免六分以是遞減至被荒四分免一分而止我朝順治初年凡被荒之地或全免或免半或免十分之三以

被災之輕重定額數之多寡順治十年議定被災八九十分者免十分之三五七分者免十分之二四分者免十分之一康熙十七年議定歉收地方除五分以下不成災外六分者免十分之一七分八分者免十分之二九分十分者免十分之三此例見在遵行凡此多寡不同之數或旋減而旋增皆因其時勢為之亦非先後互異意為增損也數十年來雖定三分之例然

聖祖仁皇帝深仁厚澤愛養斯民或因偶有水旱而全蠲

本地之租亦且竝無荒歉而輪免天下之賦浩蕩之恩不可勝舉而特未曾更改舊例者蓋恐國家經費或不敷故仍存成法而加恩於常格之外耳朕即位以來命怡親王等管理戶部事務清查虧項剔除弊端悉心經理數年之中庫帑漸見充裕以是觀之治賦若得其人則經費無不敷之事用沛特恩將蠲免之例加增分數以惠烝黎其被災十分者著免七分九分者著免六分八分者著免四分七分者著免二分六分者著免一

分將此通行各省知之朕視萬民實為一體痼瘼念切懷保情殷因思自古無不愛民恤下之人君亦斷無不急公親上之黎庶祇以時勢所值各有不同今就目前國用計之可以加惠吾民使霑渥澤是以斟酌分數定為規條儻將來國用益饒更可加增於此數之外假若經費或有不足百姓自然踴躍輸將則此例又可變通必不因朝廷格外之恩而遂忘奉公之本念也如此則君民一心上與下各盡其道太和洋溢感格

上蒼將見災沴全消雨暘時若豐亨有慶旱澇無聞豈不
美歟竝令各省督撫轉飭有司遍諭鄉村衆庶咸使聞
知

十月辛卯

上諭戶部直隸為首善之地今歲春麥秋禾俱登豐稔民
人樂業朕心深慰但地方有歷年帶徵之錢糧若令新
舊竝納雖逢豐稔之歲而民力未必寬然有餘若欲使
小民共被恩澤惟有將明年之賦預行蠲免著將直隸

雍正七年額徵錢糧內蠲免四十一萬七千八百九十兩爾部可確查分數行文該督通行所屬州縣一體敬謹遵奉以副朕愛養黎元加惠畿輔之至意

十一月庚戌

上諭戶部福建歷年地丁錢糧雍正四年冊報共未完銀四十四萬二千一百餘兩其或欠在官或欠在民從前未曾分別明晰經朕特遣大臣會同督撫徹底清查除查出官吏侵蝕那移虧空外實在民欠銀三十三萬八

千三百餘兩朕思今年閩省州縣有數處微欠雨澤收成諒不能十分豐足若於明年徵收正額之外仍帶徵歷年舊欠恐民力艱於輸將茲特大沛恩膏將康熙五十五年起至雍正四年民欠地丁銀三十三萬八千三百餘兩概予蠲免其有已徵在官者即照數留抵雍正己酉年本戶正賦此朕惠養黎元勤求民隱之至意該督撫等應仰體朕心家喻戶曉竝嚴飭州縣等官實力奉行務俾小民均霑實惠儻有不肖州縣陽奉陰違或

將已徵在官者侵匿入己仍作民欠開報或將應行蠲免者私自徵收一經察出定將州縣官從重治罪該督撫一併嚴加處分再雲南貴州四川廣東廣西等省皆係邊遠地方如有歷年實在民欠錢糧俱著該督撫詳細查明將實數具奏

十二月甲午四川巡撫憲德奏西藏烏蒙等處辦理軍需蒙恩動用倉穀毋許絲毫累民今崇慶州紳衿士庶以己資代辦穀至三千餘石及催令赴

倉領回皆稱情願捐輸留為本州儲備

上諭戶部崇慶州士民慕義急公情詞肫摯此皆

聖祖仁皇帝六十餘年深仁厚澤浹髓淪肌之效朕心甚
為慰慶著將崇慶州雍正七年額徵錢糧全行蠲免以
示格外加恩善良之至意

大清世宗敬天昌運建中表正文武英明寬仁信毅大孝
至誠憲皇帝聖訓卷二十八